

韓
文
類
譜

韓文類譜卷第一

韓吏部文公集年譜

汲郡呂

大防

代宗大曆三年戊申

集序云愈生於是年

大曆十四年己未

德宗建中元年庚申

建中四年癸亥

興元元年甲子

貞元元年乙丑

貞元八年壬申

是年進士及第年二十五

貞元十一年乙亥

是年上宰相書不報五月東歸作感二鳥賦

貞元十三年丁丑

是年從董晉辟爲汴宋潁亳觀察推官

按公行狀從辟在十二年七月此差一年

貞元十五年己卯

是年晉死愈從喪歸作汴州亂詩

貞元十六年庚辰

依徐州張建封

按公去年之二月末已至徐矣此日足可惜詩可考

貞元十九年癸未

是年拜監察御史坐言事貶連州陽山令時有送浮圖文暢孟東野序

貞元二十年甲申

是年移江陵掾以四門博士徵

按公移江陵掾在明年未嘗以四門博士徵也不知何所本

貞元二十一年乙酉

是年順宗永貞元年時有進學解永貞行豐陵行五箴

按進學解元和七年作所謂三爲博士是也豐陵行亦明年七月作

憲宗元和元年丙戌

是年作釋言云自江陵召拜國子博士

按釋言作於二年春時李吉甫已登相位矣

元和二年丁亥

是年作元和聖德詩

元和三年戊子

是年分教東都

按公行狀分教東都實始去歲

元和四年己丑

爲國子博士改分司都官

元和五年庚寅

爲河南令

元和六年辛卯

拜職方員外郎時有送窮文寄盧仝詩雙鳥

詩石鼓歌月蝕詩

按公效玉川子詩云元和庚寅斗插子
是在五年之十一月也或當踰年效所
作然實無所考也

元和七年壬辰

時有石鼎聯句序毛穎傳

按撫言云韓文公書毛穎傳好博塞之
戲張水部以書勸之以張籍二書考之
蓋貞元中在汴州日作又柳子厚書毛
穎傳後謂自吾居夷不與中州人通書

有來南者時言韓愈爲毛穎傳而與楊
誨之書云足下持韓生毛穎傳來僕甚
奇之子厚遷永州憲宗初即位也而與
楊誨之書云今日有北人來示將籍田
勅籍田在元和五年則是毛穎傳蓋作
於元和初年間撫言固誤矣而此譜以
爲元和七年者實非也

元和八年癸巳

拜比部郎中史館修撰時有荅元侍御書與
劉秀才論史書

按公是年三月拜史館修撰荅元書蓋
踰年九月也書云前歲辱書是踰歲後
荅書也當附來歲

元和九年甲午

拜考功郎中知制誥作藍田縣丞廳記

公是年十二月十五日知制誥洪云唐
本藍田丞記元和十年作當從之

元和十年乙未

拜中書舍人

考唐實錄拜中書舍人在來年正月此

差一年

元和十一年丙申

拜右庶子

元和十二年丁酉

是年裴度討淮西命愈彰義軍行軍司馬是
年拜刑部侍郎爲淮西碑

考公進平淮西碑表蓋來歲之三月也

元和十三年戊戌

元和十四年己亥

諫佛骨貶潮州有諫表

元和十五年庚子

移袁州刺史召拜國子祭酒有與孟尚書書

穆宗長慶元年辛丑

長慶二年壬寅

二月拜兵部侍郎宣諭鎮定改京兆尹

按唐舊紀拜兵部侍郎實元年六月是
歲以本官宣諭也尹京兆亦在來歲之

夏

長慶三年癸卯

十月改兵部侍郎尋拜吏部侍郎

公再爲兵部蓋去歲之秋嘗遷吏部及是夏尹京兆故也譜文太略

長慶四年甲辰

有南溪始泛詩八月疾免吏部侍郎十二月卒

予苦韓文杜詩之多誤旣讎正之又各爲年譜以次第其出處之歲月而略見其爲文之時則其歌時傷世幽憂竊嘆之意粲然可觀又得以考其辭力少而

銳壯而健老而嚴非妙於文章不足以
至此元豐七年十一月十三日汲郡呂
大防記

續溪章氏松泉莊讀過

韓文類譜卷第一

雞正云西八月小珍
環山館依宋本校

吳郡李士芳鐫

韓文類譜卷第二

韓文公歷官記

信安程 俱 致道

予友彭城陳傳道

師仲

少時嘗稟具韓文公

歷官出處之槩凡傳不載而見於他書者將一二以記比出舊藁示予予疑未廣因補次其遺十增七八其所攷訂微言小節纖悉畢具蓋得於文公之文者爲多至其論辨是非與夫坎壈之致則著之尤詳蓋古之賢士信道堅篤其出身從仕下不爲卑賤之所訕塞

既貴不爲高官厚祿之所誘制而唯辨不苟
己事不苟隨雖關摧節沮而終不撓者如文
公可得見耶故樂記其事而傳之若本傳所
載此則略云崇寧元年八月一日信安程俱
致道叙

韓文公愈字退之昌黎人其八世祖茂仕後魏

號安定相王

見皇甫湜所作神道碑及公作韓滂墓銘

次子金部尚書

均均生駿雅州刺史駿生泰曹州司馬泰生桂
州長史叡素叡素生四子長曰仲卿祕書郎武
昌鄱陽令贈尚書左僕射次曰少卿當塗丞曰

雲卿監察御史曰紳卿高郵尉愈仲卿之幼子

也以大曆三年戊申歲生三歲而孤養於兄會

六歲時兄宦王官又從居秦見行狀及祭鄭夫人文七歲已

知讀書能記他生之習十三能文見公與邢君牙書能記他生見

行狀會責韶州亦從之會歿嫂鄭挈以北歸葬會

河陽既又就食江南見祭鄭及姪老成文貞元二年始至

京師舉進士凡四舉至八年乃登第年二十五

矣三選於吏部不得官聞吏部有博學宏辭選

者再試纔一得又黜於中書見歐陽生哀詞及邢君牙崔立之書十一

年正月三上書時相不報時相盧邁賈耽趙憬

也

以年月攷唐書宰相表得之

五月去京師

荅李翱書云在京城八九年無所資云云

有

不遇時之歎感二鳥以賦過潼關遊鳳翔以書

抵邢君牙不得意去

感二鳥賦云貞元十五年一本作十一年賦序云自七歲至今

凡二十二年則是二十八歲其爲貞元十一年明矣若十五年則已罷汴吏而之徐矣未嘗出國門以過潼關也

十二年秋七月董晉節度汴州辟署試校書郎

汴宋毫潁四州觀察推官

李肇國史補作巡官恐當以此爲正

明年

七月退休于居作復志賦十五年二月晉薨隨

晉喪出四日而汴州亂愈家在園中尋得脫下

汴東趨彭城愈從喪至洛還孟津渡汜水出陳

許間抵徐州節度使張建封居之于符離睢上

及秋將辭去建封奏爲節度推官試協律郎

見贈

張籍詩聞子高第日云云及孟郊書官見行狀受牒之明日在使院中有小

吏持院中故事來其中有自九月至明年二月終皆晨入夜歸無故不許出愈上書建封言非己所能請寅入辰退申入酉退亦不廢事建封好擊毬愈累書諫又爲詩曰汴泗交流以諷營田巡官陳從政得白兔於符離愈以謂盜逆臣伏之象請表聞

按柳子厚代京兆府賀徐州刺史張愔所進白兔表愔建封子也建封卒愔自

稱知軍事朝廷從之蓋建封未及以表
聞而愔獻之也建封死於明年五月此
事當次於朝正既還之後方可

是歲冬建封使愈朝正于京師國子監四門助
教歐陽詹欲率其徒伏闕下請愈爲博士會監
有獄不果上見詹明年夏去徐州將西居于洛
陽見題李尋選授四門博士會勅旨令百寮議

帝生璧愈獻議當帝計愈去徐貞元十六年也祫時獻祖施士宜居東向之位景
皇帝宜從昭穆之列墓誌云貞元十八年太學博

士施士則公爲博士當是十七十八年卒其僚韓愈爲之辭

公議禘祫新史禮樂志及陳京傳並見
但傳文稍詳然京傳載初集議實在貞
元十七年公議與韋武陸渥等議並列
于後至十九年遂定從王紹等議故今
公議狀首載云今月十六日勅旨宜令
百僚議限五日內聞奏則是首議之日
有此旨也是公除博士蓋在十七年也
洪樊二譜以爲初除在十八年誤矣詳
見洪譜

十九年遷監察御史是年京師旱民飢詔蠲租

半有司徵求反急愈與同列張署李方叔上疏
言狀天子惻然卒為幸臣所讒貶連州陽山令

見寄翰林三學士詩及祭張署李郴州文署墓誌愈時年三十五矣按德宗紀十九年七月自正月不雨至于月甲戌雨所謂幸臣蓋李實也實時尹京據實本傳二十年關輔飢實方務聚斂云而新唐書乃云上書論宮市被斥與此不合

順宗立改元永貞赦天下遷者皆追回愈為觀

察使所抑財徙江陵府法曹叅軍

八月十五日夜贈張功曹詩略

云昨者州前槌大鼓嗣皇繼聖登憂臯遷者追回流者還滌瑕蕩垢清朝班州家申名使家抑坎軻只得移荆璽云云

道經岳陽登樓賦詩浩然有掛冠之興

岳陽樓別實司直詩

終篇云行當掛其冠生死君一訪

憲宗元和元年六月召還權知國

子博士見釋言

會擒劉闢上元和聖德詩久之從

兄俞卒開封尉俞哀其孤乞分教東都生以收

其孥教畜之

見俞墓誌

三年改直博士

見行狀

明年爲

都官員外郎分司東都判祠部中官號功德使
司京城觀寺尚書斂手失職愈按六典盡索之
以歸日與官者爲敵惡言詈辭狼籍公牒乃上
書留守鄭餘慶乞與諸郎官更判不見允五年
代薛戎爲河南令與處士石洪溫造盧仝故登
封尉盧殷常來往殷死爲買棺木

見薛戎盧殷墓誌

少室

山人李渤以拾遺召渤堅卧不起愈以書勸說
之渤悅其言乃行

公遺李渤書在三年十二月洪已辨之
按新史云渤隱少室元和初以右拾遺
召於是河南少尹杜兼遣吏持詔幣即
山敦促渤謝不拜洛陽令韓愈遺書云
云渤心善之始出家東都朝廷有關政
輒附章列上按杜兼爲少尹實在三年
次年則遷尹矣兼亦竟卒於次年之冬
固不應在五年也公五年爲河南令亦
非洛陽也

有軍人有罪愈追而問之不時至怒杖之軍吏

紛紛入告留守不察愈上書辨決去就當是神策軍

明年遷朝議郎職方員外郎上騎都尉時富平梁悅爲父報仇殺人詔議愈狀請定其制曰凡有復父讎者事發具事由下尚書省集議華州刺史奏華陰令柳澗罪將貶之愈上疏請辨曲直既按澗有犯愈由是左遷國子博士盧仝時客常州見除目歎之以詩盧仝詩云今日除書報韓君又學官久之作進學解執政聞之遷比部郎中史館修撰入館不修史或貽書勸其筆削愈荅書以謂自古爲史者不有人責必有天災柳宗元聞而非之

以書箴其失八年監修李吉甫以前官韋處厚
撰順宗實錄授愈同修撰沈傳師直館宇文籍
修成凡五卷上之詔以其間頗有抵牾者復詮
改以進尋轉考功郎中修撰如故數月知制誥
上將平蔡命御史中丞裴度使諸軍以視兵還
奏兵可用賊可滅頗忤宰相意見行狀會盜殺宰
相及傷中丞捕賊甚急得賊未給賞愈表言方
竊據未平宜示人以信趣給賞朝議多欲罷兵
愈狀論淮西事宜以謂蔡可立破所未可知者
在陛下斷與不斷耳請遣諸道兵募土人以足

兵數又請分爲四道擇要地屯聚量勢俱發又
言蔡士卒本皆迫脅若形勢已窮宜勅諸軍貸
以生命又言賞罰不可不明又請下詔淄青恒
冀使無自疑議與度合宰相惡之

見行狀

月蒲遷

中書舍人賜緋魚袋後竟以它事改太子右庶

子十一年也

科斗書記云十一年右庶子云云

十二年秋度討元

濟奏愈爲行軍司馬官如故兼御史中丞賜三

品服從度次於郾城愈知蔡卒精銳悉拒境城

中虛請兵三千間道擒元濟度未及用而李勣

自文城入矣蔡平處士栢耆以計謁愈愈白度

使其奉書諭王承宗承宗惶恐割二州獻班師

愈遷刑部侍郎

狀見行

舉錢徽代十四年正月憲

宗迎佛骨於鳳翔愈疏諫貶潮州刺史潮有鱷
魚患愈訓以文鱷徙去置鄉校以趙德攝海陽
尉教授州學有僧大顛者聰明識道理外形骸
不爲事物侵亂愈召留守署十數日與往來及
祭神海上造其廬旣行留衣服爲別不知者傳
愈稍信奉佛氏孟簡素事佛以書贊之愈荅書
以辨其冬天子進尊號稍移袁州舉韓泰代穆
宗即位以國子祭酒召還朝愈初在袁檢括良

人子女爲奴婢者計傭折直一切放之所放凡
七百人至是請立法行之諸路又論夷獠請因
改元大慶遣使宣諭仍擇經略使以鎮撫之旣
入國子監舉張惟素代又舉張籍爲博士不行
有直講能說禮而陋容學官多豪族子擯之不
得共食愈命吏召直講來與祭酒共食學官由
此不敢賤直講奏儒生爲學官日使會講生徒
喜曰韓公來爲祭酒國子監不寂寞矣狀見行又
請國子監依六典置學生三百人取文武三品
已上及國公子孫從三品已上曾孫補充太學

館量取常叅官八品以上子弟充四門館量取
無資蔭有才業人充如有資蔭不補學生應舉
者禮部勿收試又牒吏部國子監學官非通經
博涉及進士五經諸色登科人勿擬新官上日
必加研試然後放上

洪譖以復國子監生徒狀當在元和元
年謂歷官記恐誤樊本以前後編次考
之作貞元十九年任四門博士日所請
洪之意蓋以狀云今聖道大明儒風復
振恐須革正以贊鴻猷謂本於憲宗即

位也然以穆宗即位言之亦無不可請
復六典之舊奏非登科人勿擬學官蓋
皆一時事公前後四官學省然此二事
非祭酒不可要當以此爲正

遷兵部侍郎舉韋顗代長慶元年成德軍亂詔
愈宣撫遂出牛元翼還爲吏部侍郎尋改京兆
尹兼御史大夫舉馬摠代六軍將士皆不敢犯
相語曰是尚欲燒佛骨者安可忤遇旱米價不
敢踴時李紳爲中丞方幸宰相謀去之特詔愈
不臺叅紳果爭愈與之交辨又紳械囚送府杖

之愈不受宰相因言臺府不協出紳江西

按八谷友人書云臺參實奏云容桂觀
察使帶中丞尚不臺參京尹豈得却不
如聖恩以爲然便令宣與李紳詳此書
蓋臺參公面奏得旨非出宰相之謀亦
非特詔也程所書皆本新史之言故或
者遂謂公蹙紳以附宰相李逢吉皆不
考始末也蓋公恃其嘗有薦紳之恩且
視紳晚輩每事耻出其下遂至紛爭而
逢吉逐紳之謀實出於臺府既爭之後

若曰逢吉首爲此謀以逐紳而公不悟
墮其計中則亦非人情也神道碑謂宰
相乘之此言得其實也然公著順宗實
錄知京兆尹李實之不避道於侍御史
王播爲非而此反躬自蹈之又奏云是
何典故以至引赤令爲比赤令自以逐
捕之故事不相侔蓋皆一時曲辨也况
當時敕云後不得爲例則知無不臺叅
之理也 皇朝景德初呂文仲爲中丞
牒中書省用連字牒時李宗諤長西掖

亦作連字牒報之遂移書相責以至文
仲露章後亦兩罷之與此正相類

愈爲兵部侍郎舉張正甫代數日復爲吏部三
年尚書左丞孔戣上書致其事愈奏疏戣守節
清苦論議正平憂國忘家宜留以自助不報四
年病滿百日假罷以十二月二日卒初愈守潮
毛仙翁者期愈自袁州當爲某官某官後皆如
其言云

韓文類譜卷第二

雞巴云西八四小玲
瓊山館依宋本校刊

韓文類譜卷第三

韓子年譜

丹陽洪興祖慶善

歐陽文忠公言天聖以來學者多讀韓文而患集本訛舛惟余家本屢更校正後集錄古文得石刻如羅池黃陵之類以校余家本舛謬尤多若田弘正碑則又尤甚蓋由諸本不同往往妄加改易而印本初未必誤乃知文字之傳久而轉失其真者多矣則校讎之際決於取捨不可不慎也顏之推云觀天下書

未徧不得妄下雌黃信哉斯言予校韓文以
唐本監本柳開劉燧朱台符呂夏卿宋景文
歐陽公宋宣獻王仲至孫元忠鮑欽止及近
世所行諸本叅定不敢以私意改易凡諸本
異同者兼存之考歲月之先後驗前史之是
非作年譜一卷其不可以歲月繫者作辨證
一卷所不知者闕之宣和乙巳夏四月四日
荆林東齋洪興祖書

世譜

李白作退之父仲卿武昌去思碑云南陽人李

翺作退之行狀云昌黎某人舊史與退之自稱

皆曰昌黎

昌黎郡元魏置

新史曰鄧州南陽人按左傳

晉始啓南陽杜預云今河內地又馬季長云晉自朝歌以南至軹爲南陽或者因女拏墓誌云歸骨于河陽韓氏墓而葬之河陽亦古河內地遂以退之爲河內南陽人非也余考元和姓纂云南陽赭陽類當玄孫騫避王莽亂因居之又晉貞外郎韓安之生潛恬隨司馬休之入後魏恬子都爲玄菟太守因居昌黎唐書宰相世系表亦云河南尹騫居堵陽

堵音者

九世孫河東太

守術生河東太守純純四世孫安之晉員外郎
二子潛恬恬玄菟太守二子都偃偃生後魏中
郎穎穎生播徙昌黎棘城然則韓氏初徙南陽
之堵陽後徙昌黎之棘城漢書地理志有兩南
陽一曰河內修武即晉啓南陽是一曰南陽堵
陽即韓騫所徙南陽郡在唐屬鄧州故新史以
爲鄧州南陽人別於河內之南陽然堵陽在唐
乃屬均州李太白以爲南陽人是矣新史近之
李翱與舊史皆據韓氏自稱也姓纂又云後漢
司空稜穎川人稜後後徙陳留皇禮部郎中雲

卿弟紳卿京兆府司錄兄子會起居舍人愈職

方貞外新史云弓高侯頽當裔孫尋後漢隴西

太守世居潁川生司空稜其後徙安定武安後

魏有常山太守武安成侯耆耆字黃耆後魏明元帝永興中歸魏位常

山太守假武安侯卒謚曰成徙居九門生茂茂初賜爵蒲陰子轉都官尚書卒贈安定

王謚曰桓尚書令征南大將軍安定桓王二子備均均字

天德金部尚書襲爵安定公謚曰康均定州刺史安定康公生駿駿銀

青光祿大夫雅州刺史雅州都督駿生仁泰曹州司馬仁泰

生叡素見下桂州長史然則韓氏當後漢時嘗

居潁川最後徙陳留其餘遷徙不常不復可考

論其著者云

東音三

叔素

公誌從
兄岌曰
安定桓
王五世
孫叔素
為桂州
刺史化
行南方
有子四
人最季
曰紳卿

仲卿

自潞州銅
鞮尉調補
武昌令邑
人立石頌
德李白為
之文改鄱
陽令終秘
書郎皇甫
湜云秘書
郎贈尚書
右僕射舊
史云仲卿
無名位誤

晉

永泰中與
盧東美張
正則崔造
為友以王
佐自許時
號四夢大
曆中為起
居舍人貶
韶州卒無
子以老成
為後公云
有德行言
詞為世軌

唐

第

第三滂墓
誌云父老
成厚謹以
文為韓氏
良子第未
仕而死有
二子
諱行錄云
長慶四年
李宗閔下
擢進士第

唐

墓

唐史云字
北渚大理
丞諱行錄
云長慶三
年擢進士
第行第二
十一
墓誌云墳
書作文功
力兼人早
死行第二
十三唐史
云寶雞丞

李太白 武昌碑 云考觀 素朝散 大夫桂 州都督 府長史 君乃長 史之元 子也少 卿當塗 丞雲卿 監察御 史紳卿 高郵尉 新史韓

矣



當塗縣丞 太白云感 慨重諾死 於節義



禮部郎中 科斗書後 記云叔父 當大曆世 文詞獨行 中朝即雲

式行第六



率府參軍 公云為人 孝友祭老 成云吾上 有三兄見 於史者會 與介爾



吏部侍郎 贈禮部尚 書益曰文 行第十八 女六人皇

時試金用

礪賦震為 蒼筤竹詩

中第六字 有之行第 十一公祭 侯主簿文 云遣男殿 中省進馬 其名從人 從吉或云 即昶舊名 又公有符 讀書城南 及示與詩 孟東野云

恐誤



字持之撫 言云文公 令孫諱行 錄云咸通 四年第進 士時右常 侍蕭倣知 舉試諫光 賦澄心如 水詩中第 八行第二 十五

氏世系無少卿而有晉卿季卿子卿升卿凡七子蓋誤矣公曰維我皇祖有孫八人今可見者六人而已

卿也太白云雲卿文章冠世拜監察御史退之神道碑云雲卿當肅宗代宗朝獨為文章官李翱誌韓愈夫人云禮部君好立節義

甫湜云公壻左拾遺李漢集賢校理樊宗懿舊史云今史官李漢蔣係皆愈壻第四女孥早卒次適陳氏一人關

公誌周況妻韓氏云俞開封尉車越豪縱不治資業唐史誤云開

喜符郎詩有文縱張文昌云子符奉其言甚於親使令或曰符郎昶小字也但未知爽為何人爾唐小說云昌黎韓昶名父之

子為集賢校理史傳中有說金根車處悉改為銀至除拾遺為

字獻之諱行錄云咸通七年狀元及第

紳卿

高郵尉
揚州錄事參軍
涇陽令
李太白
云幼負
美譽公
云文而
能官

封令壻張徹
及況也

宗

唐科名記云
建中四年登
第壻李翱云
弇文行修立
朔方節度請
掌書記得秘
書省校書郎
累遷監察御
史貞元三年
吐蕃弗肯盟
君於是遇害
唐史云殿中
侍御史誤也
唐史無弇今
列于俞下

發

號州司戶以能官名
行第十二有墓誌

諫院不受
有以故人
之子愍之
者因辟為
鹿門從事

無競

啓餘

州來

時胡隲
侍郎知
舉試被
褒以象
天賦新
蒲舍紫
茸詩行
第二十
六

代宗

大曆三年戊申退之生

起大曆三年止貞元十四年

見李漢昌黎集序是歲代宗之六年也三星行云我生之辰月宿南斗東坡云吾命在斗牛間而退之身宮在焉且曰無善名以聞無惡聲以攘平生多得謗譽殆是同病爾

四年己酉

五年庚戌

祭嫂鄭夫人云我生不辰三歲而孤乳母誌云愈生未再周月孤失怙恃李翱云父沒養於兄會舍按盧東美誌云愈之宗兄起居舍

人君以道德文學伏一卅即伯兄會也舊史
不悟宗兄爲大宗小宗之宗遂云愈孤養於
從父兄誤矣

六年辛亥

七年壬子

八年癸丑

九年甲寅

祭嫂云未齒一年兄官王官提携負任去洛
居秦未齒一年七歲也公詩云舊籍在東都
茅屋枳棘籬生兮耕吾疆死也埋吾陂它詩

言伊洛嵩穎者甚衆蓋公屋廬墳墓在東都
河陽今年始從其兄去洛居秦也皇甫湜曰
先生七歲好學言出成文李翱曰及長讀書
能記它生之所習

十年乙卯

十一年丙辰

十二年丁巳

十三年戊午

祭嫂云年方及紀荐及凶屯兄罹讒口承命
南遷復志賦云當歲行之未復兮從伯氏以

南遷至曲江而乃息兮逾南紀之連山時年
十一舊史云大曆十二年夏五月起居舍人
韓會坐元載貶官豈以十二年貶十三年始
至韶邪柳宗元先友記云會善清言有文章
名最高以故多謗至起居郎貶官卒云起居
郎者誤也祭老成文云中年兄沒南方從嫂
歸葬河陽復志賦云嗟日月其幾何兮携孤
嫠而北旋

以唐史及通鑑考之韓會坐元載之貶
實大曆十二年也以公祭嫂文及復志

賦考之公隨會遷韶年方及紀實十四
年也賦言歲行未復蓋公生於戊申踰
年方復庚申其爲十四年明甚豈會固
嘗以他事再貶耶況諸黨元載以敗無
有度嶺者楊炎道州司馬韓洄邵州司
戶雖王縉始欲誅之亦只降括州刺史
不應會獨貶韶也樊譜只繫十四年洪
譜繫之十三年謂踰歲方至韶失於牽
合也

十四年己未

德宗 建中元年庚申

德宗以去年五月即位是年改元上鳳翔邢
君牙書云愈七歲而讀書十三而能文今年
十三

二年辛酉

三年壬戌

四年癸亥

興元元年甲子

貞元元年乙丑

建中二年成德魏博山南平盧節度相繼稱

亂三年王武俊李希烈反四年涇原姚令言
犯京師德宗幸奉天朱泚犯奉天興元元年
李懷光反如梁州公以中原多故避地江左
祭嫂云旣克返葬遭時艱難百口偕行避地
江濱歐陽詹哀詞云建中貞元間就食江南
韓氏有別業在宣城見示爽詩

二年丙寅

祭老成云吾年十九始來京城即此年也歐
陽哀詞云貞元三年余始至京師舉進士答
崔立之書云年二十時苦家貧及來京師見

有舉進士者人多貴之因詣州縣求舉公舉
進士在此年後也縣齋有懷云濯纓起江湖
謂自江南入京師

三年丁卯

四年戊辰

是年張建封爲徐泗豪節度公薦薛公達於
建封云河東薛公達年二十有六按公達墓
誌云元和四年年四十七卒自元和己丑逆
數之至今年二十六歲公時年二十一始有
文章見集中

薦公達書見外集蓋以其少年之作也
然公集有上河陽李大夫詩自咸通本
皆附正集樊云河陽李大夫疑李芑也
孟東野亦有贈河陽李大夫詩所謂上
將秉神略者是也考之史傳李芑爲河
陽節度使在德宗初年按公祭老成文
云中年兄沒南方從嫂歸葬河陽又祭
嫂文云旣克歸葬遭時艱難德宗建中
三年四年李希烈朱泚相繼稱亂德宗
出幸奉天此詩云四海失巢穴兩京困

塵埃又公時在河陽非李芄而何公時
年方十四五則公文章之見集中者未
應以薦公達書爲首也

五年己巳

上賈滑州耽書云愈年二十二讀書學文十
五年自七歲讀書至此首尾十六年一本作
二十三誤矣又云獻策闕下方勤行役時退
之復來京師

按公祭老成文云吾年十九始來京城
其後四年而歸視汝當在來年也上賈

滑州書疑來歲歸途之所獻讀書學文
十五年豈亦總言之耶舊本皆作年二
十三

六年庚午

河中府連理木頌曰司空咸寧王尹蒲之七
年渾瑊以興元元年爲河中同絳陝虢行營
副元帥咸寧郡王至今七年

七年辛未

八年壬申春登進士第

上邢君牙書云二十五而擢第於春官唐科

名記云貞元八年陸贄主司試明水賦御溝
新柳詩其人賈稜陳羽歐陽詹李博李觀馮
宿王涯張季友齊孝若劉遵古許季同侯繼
穆贄韓愈李絳溫商庾承宣貞結胡諒崔羣
邢冊裴光輔萬瑄是年一榜多天下孤雋偉
傑之士號龍虎榜

按姚康科第錄李博實本年末名科名
記錄於第四非也又歐陽詹傳謂詹與
韓愈李觀李絳崔羣王涯馮宿庾承宣
聯第皆天下選時稱龍虎榜蓋是榜由

此八人而重也

歐陽哀詞云八年春遂與詹文辭同考試登
第贈李觀詩云我年二十五求友昧其人哀
歌西京市乃與夫子親送侯參謀赴河中幕
云憶昔初及第各以少年稱祭張季友云往
在貞元俱從賓薦各以文售幸皆少年舊本
列同祭者王涯崔羣許季同庾承宣貢結胡
諒邢冊皆同年士也其它姓名往往見公集
中公與陸貞外書云往者陸相公司貢士愈
亦幸在得中其後一二年所與及第者皆赫

然有聲由梁補闕肅王郎中礎佐之梁舉八
人無有失者其餘則王皆與謀焉唐史云大
曆貞元間文士多尚古學而獨孤及梁肅最
稱淵奧愈從其徒游銳意鑽仰欲自振於一
代洎舉進士投文於公卿間故相鄭餘慶頗
爲延譽由是知名諫臣論曰諫議大夫陽城
居位五年矣城以貞元四年夏起家爲諫議
大夫至今五年

九年癸酉

省試顏子不貳過論一本注其下云貞元九

年宏詞試公上考宏詞崔虞部書云執事援之幽窮之中推之高顯之上又執事既上名之後三人之中二人者則固所傳聞矣畢竟得之而又升焉其一人者則莫之聞矣畢竟退之即答崔立之云一旣得之而又黜於中書者又云凡在京師八九年矣自貞元二年至此八年又云始者謬爲今相國所第相國陸宣公也八年夏爲中書侍郎同平章事公應科目又有與韋舍人書

按科第錄是年博學宏詞試太清宮觀

紫極舞賦顏子不貳過論應者三十二
人中選者李觀裴度陸復禮也公與崔
虞部書謂三人之中二人者華實兼者
也畢竟得之而又升焉一人者華與實
違畢竟退之豈固退公而收陸耶又上
韋舍人書謂其窮涸不能自致乎水爲
獷獷之笑者蓋八九年樊以公二年來
京師上韋書當在來年然公與崔書亦
云凡在京師八九年矣亦只今年書也
未易臆定

十年甲戌

省試學生代齋郎議注其下云貞元十年應
博學宏詞

按學生代齋郎議本題實作罷齋郎以
學生享議然亦來歲之試也科第錄十
一年試朱絲絃賦冬日可愛詩議乃此
也或注十年而洪從之非也蓋公併來
歲凡三試宏詞故也公今年又嘗歸河
陽省墳墓見祭老成文

十一年乙亥

答崔立之云四舉而後有成亦未即得仕聞吏部有以博學宏詞選者因又詣州府求舉凡二試於吏部一旣得之而又黜於中書旣已爲之則欲有所成就因復求舉亦無幸焉知公今年又試宏詞也是年正月二十七日以前鄉貢進士上宰相書云今有人生二十八年矣四舉於禮部乃一得三選於吏部卒無成又云七年而學聖人之道積二十一年自七歲至今二十二年矣後九日復上書後二十九日三上書不報乃東歸時宰相賈耽

盧邁也感二鳥賦序云貞元十一年五月戊辰愈東歸一作十五年按退之以大曆三年生至今二十八歲序言自七歲至今二十二年則是二十八歲無疑作十五年者誤也又一本云貞元五年按公以二年來京師至此才四年豈遽有不遇時之嘆或曰退之二年舉進士五年始東歸其後嘗歸江南又往河陽故祭老成云吾年十九始來京城其後四年而歸視汝又四年吾往河陽省墳墓若以十一年東歸不得云時始去京師也余曰公

年十九來舉進士至二十八歲猶未得仕十年之間往來輦轂之下者數矣至此辱於再三慨然有歸歟之興故曰時始去京師有不一遇時之歎而復志賦亦云汨東西與南北亘十年以不居也前年上崔虞部書云凡進士之應此選者三十有二人而此賦序云與百千人偕進偕退者蓋九年同試宏詞者三十人至今獨三見黜與舉進士而不第者俱爲不遇故有此語爾

時始去京師謂自京師初出也公三試

宏詞三上宰相書皆無所成於是始決策東歸也然求仕必於朝安能無望望之嘆故於初去之日尤甚也舊史貞元十一年六月河陽獻白鳥蓋公五月見於道六月始進入於時爲合又與百千人偕進偕退按姚鉉本實作百十人此賦云選舉於有司與百十人偕進退曾不得列名於薦書齒下士于朝以望天子之光明蓋專爲宏詞試也況百千亦非語公三試宏詞大都不過百十人耳

洪併同舉進士者而言之非也

畫記云貞元甲戌余在京師明年出京師至河陽祭田橫叙曰貞元十一年九月愈如東京東京洛陽也橫墓在偃師諸本多作十九年東如京按十九年秋公爲御史其冬貶陽山安得以九月出田橫墓下唐都長安亦不得云東如京也

公是歲五月已出潼關九月方過偃師故學者疑之諸本皆作東如京樊澤之又云或曰舊本作自東如京蓋公五月

出關九月復來不過皇皇於求仕耳惟程致道謂公是年去京師過潼關遊鳳翔以書抵邢君牙不得意去程必有所本也按公投邢君牙書曰六月于邁來觀其師又曰居十日而不敢進謁計公之去鳳翔當在秋半矣故九月過偃師也公祭田橫文云昔關里之多士孔聖亦云其皇皇苟余行之不迷雖顛沛其何傷公意蓋有所激也程所謂不得志者亦此也二譜失於訂正爲推明之

十二年丙子秋爲汴州觀察推官

董晉行狀云十二年七月拜檢校尚書左僕射同中書門下平章事汴州刺史宣武軍節度使公旣受命遂行劉宗經韋弘景韓愈實從唐史云十二年秋以東都留守董晉爲宣武節度汴州水門記曰維隴西公受命作藩爰自洛京單車來臨蓋公從晉自洛入汴也李翱云汴州亂董公辟公以行得試秘書省校書郎爲觀察推官而公神道碑云十四年用進士從董晉平汴州墓誌云先生三十有

一而仕洪譜云二狀載公入汴在十二年丙子與史合而碑誌所記皆後二年殊不可曉豈今年辟公以行至十四年始有成命邪亦不應如是之緩也方攷蜀本樊本無三十一而仕之文但云歷官二十有七年爾然自公卒之年逆數之亦當以十四年三十一歲爲歷官之始故公入汴雖在十二年然水門記十四年正月作石本猶但稱攝節度掌書記前進士韓愈是辟命猶未下也計必是年辟命乃下故碑誌之言如此不當以命下之緩

爲疑也

按公入汴之年洪方得之碑誌所計年數若以命下之日言之亦未爲失

十三年丁丑

公在汴有復志賦送汴州監軍俱文珍序在十三年事安得言十四年乃入汴乎要當以公之自言及二狀二史通鑑爲正持正狂躁其攷之或有未審不足據也舊史云公是歲作巡官程記已辨其非矣不知公自入汴後服官治政閒覽經史暇則與友言志悠悠於

汴逮今竟一歲矣

十四年戊寅

水門記云十四年正月隴西公命作東西水門三月水門成其從事韓愈請紀成績一本注云隴西公李勉誤矣晉行狀云十二年八月上命汝州刺史陸長源爲御史大夫行軍司馬楊凝自左司郎中爲檢校吏部郎中觀察判官杜倫自前殿中侍御史爲檢校工部員外郎節度判官孟叔度自殿中侍御史爲檢校金部員外郎支度營田判官公有天星

詩送楊凝郎中賀正唐本注云貞元十四年也柳子厚作凝墓碣云爲宣武節度判官會朝復命次于汴汴亂不可入遂西走闕下然則凝以今冬朝正明年未入汴復走京師故祭董公文列陸長源孟叔度丘穎韓愈無凝也是年有楊燕奇碑

韓文類譜卷第三